

# INUIT ATAQATIGIIT

## INATSISARTUNI



Qasigianguit, 20. august 2015  
UKA2015/93

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Folkehøjskolet pillugit oqallinnissamik siunnersuut. Folkehøjskelinik siunnerfinnik isumaliuutersuutit toqqammavigalugit folkehøjskolet ingerlatsiinnarnissaat anguniarlugu politikikkut qanoq ikorfartuisinnaavugut? Politikikkut iliuusissat suut aqutugalugit tunngaviusumik periusissatut toqqammavissat ersarinnerusut qanoq suliniutissat ingerlanneqarsinnaappat, tamatumani folkehøjskolenik isumaliuutersuutunik toqqammaveqarnerit anersaakkut tunngaviusut qaffassarneqarsinnaappat?**

(Inatsisartunut ilaasortaq, Sara Olsvig, Inuit Ataqatigiit)

### Tunngavilersuut

Folkehøjskolet ilinniarfeqarfiit allanit allaanerusumik inerisaanernik ingerlatsiviusarput nutaanik ilusiliinnaassusermik nalilinnillu pinngorartitsisinnaanernik inerisarneqarfiusarlutik. Atuarfiupput angusanik karakterilersortakkanik misilitsinnernillu qitiusumik toqqammaveqarfiunngitsut, inoqatitulli ataasiakkaatut ataatsimuualaarnernilu inuit akornaniissinnaassutsinik inersimasut inerikkiartorfiinik toqqavileeqataaffiusut. Folkehøjskolemik ingerlatseriaatsit aallarnisarneqarput inersimasut atuarsinnaanernik tamatumani inoqatitut inerisarneqarnernik naligiissumillu perorsagaanernik siunnerfeqarnernik isumaliuutersuutunik toqqammaveqarluni ilinniarfissat pilersinneqarnerisigut.

Folkehøjskolet inuiaqatigiini nalitoqaat. Højskolet ilinniarfeqarfissanik allanit nalinginnaasumik ingerlatsiviusunit tunniussisinnaanernit ilinniartitseriaatsinik allaanerusumik periusaasunik allanik toqqammaveqarnikkut tunniussassaqaqarput neqeroorutissaqarlutik. Højskolet aammataaq inuusuttut inersimasunngorsimasut inersisamasullu ukiui qassiugaluartulluunniit ataatsimuualaarfinnik misigisaqarnissamik periarfissiiffiupput. Ilinniarfeqarfiit nalinginnaasunit siammasinnerusumik tunniussinnaasaanit allanik periarfissiillutik, tamatumani højskolemiinnerit najugaqateqarnikkut højskolemi najugaqatigiinneq aqutugalugu ingerlanneqartarmata, taamaasillunilu ulluunerani aammalu unnuunerani ilinniarfimmiinermi peqatigiinnerit ataatsimoornerillu ingerlanneqarlutik inooqatigiiffiusarmata.

Højskolemiissimaneq inunnut amerlaqisunut inuunerup sinnerani eqqaamasassanik kinguneqarfiusarpoq, inoqatitut inerisarneqarfiulluni aammalu ilinniagaqaqqinnissamut piginnaanngorsarfiusarpoq inuunerullu illernani ingerlariaqarfissani toqqammavissanik pissarsiffiusarluni. Inuit Ataqatigiinnit pisuussutaasoq pineqartoq inuiaqatigiinni pigiinnarneqarnissaa kissaatigaarput. Tunngaviliiffissat pilersikkumasagut højskolemik inerisaanissanik ikorfartuiffissanillu toqqammaviliissapput, tamatumani folkehøjskolemik ingerlatseriaatsit aallarnisarneqarnerpiaani toqqammaverpiaasut ikorfartorneqarnissai inerisarneqarnissaalu kissaatigaavut.

Højskolet inatsisaannik allanguinikkut ukioq 2010-mi piginnaanngorsaanernik ingerlatsiviusunik ilinniarfissanik Kalaallit Nunaani højskolet marluusut neqerooruteqarsinnaalerneranik ammaassisarpoq, taamaasiluni højskolet ilinniagaqarfearfiit nalinginnaasut allat assigalugit iliuusissanik periuseqarnissamik atuutsitilersinnaalerneranik annertusisamik periarfissinneqarlutik. Allanguineq pineqartoq

Inuit Ataqtigiinnit suli attanneqarnissaa kissaatigaarput, maluginiarsimavarputtaarli højskolet ukiuni kingullerni aningaasaqarnikkut artorsartinneqartut.

Eqqasuutigaarput højskolet tamat isigalugu ingerlatsivittut ingerlaannarnissaaq anguniarlugu suli annertusisamik isertitaqarniarnerunissaaq anguniarlugu ilinniartitseriaatsinik ingerlatsinissanik avammut suliakkiissuteqartalernerulernissanik periuseqarlutik ingerlatsilertariaqalernissaasa annertusiartortumik aqqutissatut atorneqartariaqalersinnaaneri, imaluunniit ilinniarnertit aalajangersimasunik siunnerfeqartunik avammut suliakkiussinikkut ingerlatsisariaqalernernik kinguneqarfiulersinnaaneri, tamatumani højskolemik nalinginnaasumik ingerlatsinissaasa qulakkeerneqarnissaat tunulliuttariaqalissallugu.

Taamaammat Inatsisartuni folkehøjskolet pillugit tamatigoortumik oqallinnissaaq kissaatigaarput. Tamatuma saniatigut kissaatigaarput oqallisigineqassasoq qanoq iliornikkut folkehøjskolet nammineq ingerlatsivittut inissimaneri ataqqillugit ingerlatsiviinnarnissai politikikkut qulakkeeqataaffigisinnaaneripput, taamasillutik højskolet annertusisamik kingumut højskolemiinnernik nalinginnaasunik neqerooruteqarsinnaaneruleqqissinnaanissai anguneqarsinnaaqqullugit, tamatumani inuiaqtigiinni sapinngisamik siammasissumik inuiaqtigiinni assigiinngisitaarfiusunit inunnik højskolernissanik neqeroortoqarsinnaalersitsinissat angujumallugit.

Isumaqarpugut højskolet inuusuttut innuttaasullu nunatsini ilaatigut suliffissarsiortunut neqeroorutitsialaasoq allaanerusumik ingerlatsiviulluni periuseqarfiusoq tikilluaqusariaqartoq, kissateqarfiusorlu ataatsimoorfeqarnernik inoqatitullu inerisarneqarnernik kiisalu naligiissumik perorsagaanernik tunaartaqarluni ingerlatsiviusoq tikilluaqusariaqartoq.

Inuit Ataqtigiit qilanaarivarput neriutugalugulu højskolet pillugit pitsaasumik isummanillu pigiliuteriigaannangitsunik isiginneriaaseqarluni oqalliffiussasoq tulliuuttullu siunnersuutit Inatsisartuni oqaaseqaatissatut saqqummiutissallugit:

**Inatsisartut oqaaseqaatissaattut siunnersuut:**

Oqallisissiatut siunnersuut tunngavigalugu Inatsisartut oqaaseqaatissaattut siunnersuut tulliuuttoq saqqummiuppara:

Inatsisartut ernumagaat ukiuni arlaqareeqisuni højskolet aningaasaqarnikkut unammillertunik aqqusaagaqarsimammata, tamatuma kingunerisaanik folkehøjskolernissamik tunngaviusut neqerooruteqarnissanik ingerlatsinissanik suli ajornarsiartuinnartunik kinguneqartitsisamasut. Inatsisartut nunatta folkehøjskolet marluk pigisai inuusuttunut inersimasunullu tunngasunik ingerlatsivittut, højskolemillu ingerlatsivittut kissateqarneri tunaartarineqarlutik ataatsimoornerit inoqatitullu inerisaanerit pingaartippaat. Inatsisartut Naalakkersuisut kaammattussavaat Inatsisartut suleqatiginerisigut folkehøjskolet nukittorsarneqarnissaannut periusissanik nassaassasut, tamatumani folkehøjskolemik ingerlatseriaatsit pillugit isummat toqqammaviusut najoqqutaralugit ingerlatitseqqinnerulernissaat neqerooruteqartarnerillu annertusarneqarnissaat anguniarlugu.